

Huldiging van geweldige clubluuj maak gesjlaagde Familiedaag compleet

Ut is un goud joarliks gebroek binne os vereniging om un voetbalseizoen aaf te sjeite mit unne daag wo-op de voale vrijwilligers in ut zönke waere gezat. In juni woare d'r echter angere prioriteiten die de aandacht van os besjtuur vroege: de aanboew van de kantine moosj veur de sjtart van de nuuje competitie aafgerondj waere.

Wie ich deze zomer unne keer ut complex op leep om mien zeunkes te vertelle dat ut tied woar om te sjtoppe mit voetballe, trof ich doa enkele bekende gezichten aan. Tom Keulen, Raymond Dukers en Robert Kraus sjtonge noa hunne wirkdaag mit hun kleijer onger de sjtub en mit bezjweite köpkjes te wirke aan dae nuuje oetboew. Op zulke momenten realiseerse dich wie onrechvaardig ut is dat d'r jeder seizoen op tal van plaatsje euver allerlei problemen wurt geroupe: "Dat houw dat besjtuur toch al lang motte regele!" of "woarom regelt ut besjtuur dit neit ens fatsuunlijk?"

Loate veer greutsj en bliej zeen mit de kanjers die ut besjtuur van os vereniging vormen. Auch zïe zeen vriewilligers.

Die kanjers houwe, temidde van de drukke veurbereiding op ut nuuje seizoen en ut wirk aan de aanboew, nog tied gevonje om auch nog unne Familiedaag te organiseren veur de voale vrijwilligers én leden van ozze vereniging. De aankondiging volgde via unne fraaie flyer:



Zondag 18 September

Familiedag & seizoensopening

Inzegening Nieuwbouw **Diverse Clinics**

& de coryfeën van 21/22
Stermen/jeugdleider/De Jenkert

Springkussens en stormbaan **Vrijwilligers in ut zönke**

Aanvang 14.00 uur **Sportpark 't Hetjen**

DJ Stan the Man **& Specials guests**

Henrico Aquilini **Jerome Loco Loco Gelissen**

Aafgeloupe zondag waar ut dan zo wiet. De kantine waar fraai aangekleid, de drank waar taeghe unne gereduceerde pries, de topartiesten woare opgeliend, de sjpringkussens en sjtormbaan sjtinge kloar boete en de geur van de heerlijke Dukers-vlaai koom dich tegemoud bie binnekomst.

De raeghe leek get roet in ut aete te gooien maar aeve goud houwe d'r un heel aantal kinjer (in de blote pens) sjpas in de sjtruimende raeghe op de sjtormbaan. Binne zoot de sfeer d'r prima in, mede dankzij DJ Stan "the Man" Ortmans dae sowieso al unne top-daag houw. Sjmurges mit ut veerde dik gewonne, doanoa "zien" PSV zeen winne taeghe Feyenoord en vervolges lekker de kantine vermake mit goeie meziek.

De ras-artiesten Henrico Aquilini en Jerome "loco loco" Gelissen deige de res, wodoor de sjtumming opperbest waar en ut beier riekeliijk vloeyde. Boete verzurgde BBQ-chef én sjtille verenigingskrach Roy Wessels d'r veur dat jederein koosj sjmulle van get lekker vleisj.

En wiejer houw ut besjtuur ut binne druk om jedere jeugdleider/vrijwilliger bie binnekomst nog op un fantastisch cadeau te traktere. Op de groepsapp van de jeugdleiders leidde dat, volkomen terech, tot bedankjes:



Tusje ut feestgedruis door woorte d'r auch nog get luuj in ut zönke gezat. Want es vereniging zeen veer weliswoar greutsj op al os vrijwilligers, maar d'r zeen jeder joar waal get luuj die get extra aandacht en waardering verdeine.

Richard Jager - Jeugdleider van ut joar

Te beginne mit Richard Jager, trainer van ozze JO14-2 dae woort oetgeroupe tot jeugdleider van ut joar.



Vrij kort noadat ziene zoon Espen (inmiddels sjpelend in de JO17-1) begooj mit voetballe sjtelde Richard zich besjikbaar es jeugdleider. Eesj enkele joare es trainer van de teams wo ziene zoon in voetbalde, maar sinds enkele joare woar dat in huize Jager gein ideale situatie meer. Zo wie bie voal gezinne zeen de kinjer op enig moment oetgekeke op dae fanatieke pap dae al joare de coach is. In de meeste gevalle leidt dat tot ut einde van ut vrijwilligers-besjtoan van papa. Zo neit bie Richard.

Dae besjloot om geweun un anger team te goan traine. Sjterker nog. Dae zei: ich houf neit un team mit de beste voetballers. Loat mich maar wirke mit kinjer die nog unne houp motte lere. Doa maak ich waal un team van en die loat ich sjpas belaeve aan voetballe en samewirke. En dat deit Richard inmiddels al seizoenen langk. Wobie auch nog vermeld moag waere dat Richard doanaeve doodleuk ut handjbalteam van zien dochter traint. Unne op- en top vrijwilliger en sjportman dus!

Veer hoape van ganser harte dat hae dat nog voale joare wult blieve doon want hae in unne absoluut onmisbare sjakel in ozze jeugdaafdeiling gewoare. Unne zeer terechte winnaar es jeugdleider van ut joar! Richard, van harte!

Robert Kraus – Sterman van ut joar

Vervolges woort de Sjterman van ut joar oetgeroupe. Robert Kraus wis vanteveure ein dingk zeker: “Dae pries höb ich al ens gewonne dus benuuj wae ‘m dit joar geit kriege...”
Nou Robert, dat woars doe toch éch zelf!

Altied leuk es ut un verrassing is veur de winnaar. En ut feit dat ‘r ‘m al ens gewonne haet? So what? Al woar ut ut viefde joar op riej. Esse ‘m verdeins, dan mosse ‘m geweun kriege.



En nemes verdeint dae pries dit joar meer es Robert. Es veurman van de wirkploug is hae van alle ins en outs op technisch- en planningsvlak rondjom os complex op de hoogte. En wat dach geer van ut wedsjtriedsecretariaat bie de senioren dat hae bemant. Of de veurtrekkersrol die hae veur ozze walking footballers vertolk. Of ut fluiten bie de veteranen en de legere seniorenteams? Ut mede organiseren en faciliteren van de voetbalwaek veur de kinjer. Ut hilt neit op.

En tel doa nog ens al die oere geregels, geplan én zelf wirke aan de aanboew bie op. Robert is unne onbetaalbare man veur os vereniging. Loate veer hoape dat hae nooit d’r mit sjtop en doorgeit tot ‘r d’rbie neervilt, want angesj kenne veer 8 nuuje vrijwilligers zuike om al zien taken euver te versjpreiden.

Robert, van harte gefeliciteerd mit de dikverdeinde pries!

Oapening van de nuujboew door Eedje Smeets

Vervolges woar ut tied veur un officieel moment: de oapening van de aanboew door ein van de mannen dae doa enorm voal arbeidsoere in haet gesjtoake, metselair Eedje Smeets. In de hoop dat ich nemes vergaet, bie deze un opsomming van de luuj die de nuujboew muigelijk gemaak hōbbe.

Aan de (teiken/denk) toafel: Rene (Bo-Tek) Savelkoul, Sjo Paul Drummen, Henk Sipers, Raymond Dukers, en Tom Keulen. De metselaire Théke en Eedje.

Wiejer de veule hendjes van de wirkploog; met name Jo Goossens (dea os tiedes de verboewing is ontvallen), Louis Muris, Henk Goossens en Jan Delbressine. Biegesjtoan door Frans de Keuning.

De sanitair man Remo van der linden, vonketrekker Roy "ledje" Wessels. Ozze stukadoor Thei de goudvusj. Ozze tegelzetters de Heffeltjes. Ozze chauffeur en stiegerbouwer Arnoldje Driessen en het leveren van de stiegerplanke door Rene Gooren. Graafwerk van Partrick Nordhausen en Ger Conjour. Ster-mannen wie Maurice Aarts, Bartje Linders en Kenny Lemmens. De firma's DAS (veur het aafhange van de deuren) de Lebbinck (veur ut leveren van het sanitair), Firma Janssen (veur het leveren van de dakbenodigheden) en wiejer Dirix en Wijnands oet Aelse.



Eedje verrichtte de oapening names al die angere vriewilligers die d'r tied en energie in gesjtoake hōbbe.

Tom Keulen – Lid van verdeenste

Doamit leke alle plichtplegingen gedoan. En in de kantine woare al geluiden te heure van “dae Tom de Keul zet maar ummer anger luuj in ut zōnke, maar verdeint dae zelf neit ens de spotlights”.

Nou, tot verrassing van de aanwezigen en van Tom in ut bezunjer, houwe zien mede-besjuurders doa al get op bedach. Want Tom woort, veur 'm zelf volkomme onverwachs, benuimp tot Lid van verdeenste van os vereeniging.



En wae kent ut doa noe mit on-ens zeen? Helemaal nemes.

Want wat haet Tom allemaal waal neit gedoan in de loup der joare? Gekeep bie de legere elftalle, trainer en leider van ut damesteam. Vlagger en sjeidsrechter van diverse teams. DJ op feeskjes. Jeugdleider auch. Organisator van tal van events. Besjuurslid, vice veurzitter, interim veurzitter en sinds enkele joare penningmeister.

En dan hōbbe veer ut nog neit gehad euver al die oere en oere wo in Tom nuuj leden opvingk en wegwies maak, tal van commissies ongersjteunt, luuj un hart onger de reim sjtik, brandjes blust, problemen oplos en angere in ut zōnke zet.

Tom, doe bes unne geweldenaar. Van harte gefeliciteerd mit dien benuiming. Datse nog maar heel get joare moags loate zeen dat unne besjuurder neit boave maar tusje de leden sjteit.

Geweldig om te zeen dat ut dich éch geit deig aafgeloupe zondig. Dat teikent wievoal de club veur dich beteikent. Sjiek!

Helaas woare nog twee angere prieswinnaars neit aanwezig zondig. Want geer zeet natuurlijk ongetwiefeld benuuid wae de prestigieuze “Jenkerd van ut jaor-award” geit winne. En ich ken uch auch nog verklappe dat d’r nog emes un hele bezunjere ongersjeiding geit kriege. Dat geit ongetwiefeld de kommende waeke bie un gepaste gelegenheid gebeure.

Ut woar waer unne sjieke zondig. Op noa de competitie!

Rob Sjulpe